

首都師範大學中國書法文化研究院 編纂
歐陽中石 主編

文津閣四庫全書
書畫藝術文獻匯編

第二十冊



商務印書館

本冊書目

御定書畫譜(六)

九十四卷至一百卷

清・孫岳頒

一

秘殿珠林

二十四卷

清・乾隆九年敕

二三五

欽定四庫全書

御書畫譜卷九十四

歷代鑒藏四

書

明張世清河書畫舫

韓存良太史購藏鍾元常摹鐘鼎篆正考父鼎銘當為魏漢遺墨之冠其次則王元美尚書家正書薦季直

表上有畫錦堂等印及元人跋尾元美續收褚河南

欽定四庫全書

御定書畫譜
卷九十四

哀冊文顏平原送裴將軍北伐詩並屬真筆

晉武帝我師帖真蹟宣和祕府官本今在震澤王氏當

為帝王書法之冠

韓存良太史家陸士衡平復帖計九行墨色有綠意紙

亦不雜碎前有宋徽宗泥金標題又聞王羲之破羌

帖王獻之洛神十三行晉人小楷曹娥碑楊羲黃素

黃庭經唐玄宗鶴鵠頌褚遂良千文張旭宛陵帖鍾

紹京靈飛六甲經吳通微千文懷素論書帖

或云山
水帖

徐浩道經上卷賀知章千文顏真卿自書誥吳融博

士帖蘇軾自書八賦米芾草書十二帖宋高宗絹本

洛神賦並有李昭道臨顧愷之圖畫趙孟頫小楷道

德經全本種種真蹟在其家未及全見之

索靖章草出師頌一卷用黃麻紙書之上有宣和印識

朱色如新興古譜文合文壽承定為真蹟為之刻石

或云頌文蓋出蕭子雲元初藏霍清夫處見雲煙過

眼錄宋時在錢勰房下亦見米氏書史

欽定四庫全書

御定書畫譜
卷九十四

謝安石書六十五字四角開元小璽御府書也永存珍

祕印入唐相王涯家翰林之印建中御府所用

東方朔畫像贊相傳逸少真蹟乃永和十二年五月十

三日書與王敬仁者筆蹟茂密法律森嚴其糜破處

歐陽詢補之宋初在丁諷學士家尋入宣和祕殿有

御書璽記暨南渡後復歸趙與勤家雜見書史書譜

雲煙過眼錄中

王羲之袁生帖釋懷素夢游天姥吟皆宋府祕物為吳

王氏藏本並神品也

周敏仲攜示逸少行穰帖一卷亦載宣和書譜中首尾
璽跋宛然予細辨乃唐人硬黃臨本定非真蹟先輩
言祕府御題書畫真贋相雜驗之信然

逸少草書司馬帖今在山陰人家宣和祕府故物也筆
法淳古可愛為真無疑

五字不損本定武蘭亭序一卷元初藏譚崇文許有寅
亮元章等題名張仲壽趙孟頫袁桷諸賢跋尾相傳

欽定四庫全書

御定書畫譜
卷九十四

三

歐陽率更所模墨花滿面真希世之寶也茂實府君
購得一本筆法精勁高古較唐宋摹搨字形幾小一
倍後歸之大兄矣

陳仲醇妮古錄云今皇帝天藻飛翔雅好書法每攜獻
之鴨頭丸帖虞世南臨樂毅論米芾文賦以自隨董
其昌聞之中書舍人趙士禎言如此因考右軍曾書
文賦今可見者趙榮祿書耳

獻之中秋帖卷藏於樵李項氏子京自有跋細看乃唐

人臨本非真蹟也卷首截去十二月等六字亦無米
贊可考第裝背標錦則宣和舊物也豈南宮寶帖元
末曾輸入大內邪

震澤王氏陶隱居黃庭外景經楷法俊逸翩翩不羣云
係張可與故物可與號繡江前元進士生平寶祕蕭
子雲進寫古文啟真蹟及此

李文正公家藏智永十文一卷是藏鋒書前有宋徽宗
瘦金黃綾帖云梁擇智永真草十文合縫用宣和等

欽定四庫全書

御定書畫譜
卷九十四

四

印雖歷世久遠字畫畧無殘缺今在武陵高氏
吳原博先生家藏林藻深慰帖宋祐陵故物也有紹興
二璽柯九思陳彥廉等印有李侗張仲壽黃中邵亨
貞表華張適李東陽文徵明八跋跋載鐵網珊瑚中
唐文皇手勅一通用黃麻箋書之今在韓存良太史家
宋祕府故物也右帖全倣右軍風神散朗品在宋思
陵上屢欲告假刻石卒未得

唐玄宗御書鵲鵲頌白麻紙真蹟結構精謹筆法縱橫

迴出吾家思陵御書叙文之上後有蔡京蔡卞二跋亦妙近周敏仲購得一本乃雙鈎填墨者至積時不晤良可歎也

敏仲所收唐玄宗恤獄詔當時勅付毛應佺者黃麻紙書舊在樵李項氏朱忠僖故物也

虞永興汝南公主墓誌稿凡十八行見米老寶章待訪錄後入郭天錫家元章跋尾尚存今藏瑯琊王氏敬美奉常故物也項金壇王宇泰太史賞其峭跋為摹

欽定四庫全書

御定書畫譜
卷九十四

五

入鬱岡齋帖中矣

樵李項氏祕藏歐陽詢行書夢奠帖清勁絕塵乃楮紙真蹟宋末藏郭天錫處子昂二識尾勤有堂故物也其後又入楊東里家有東里跋跋今不存右帖授受有緒的是名物陳仲醇定為宋人書豈為世所淆亂邪

近聞歐公夢奠帖及顏書鹿脯帖俱在樵李項氏當往觀之

褚河南黃麻千文一卷瘦勁絕倫楷書真筆後有宋灋等跋今在韓宗伯存良家凡十數閱唐人書法世不多見此真可寶者

韓氏藏褚遂良楷書千文黃麻紙大類所書聖教序疎瘦婉暢逸氣趣翩翩按宋潛溪跋尾河南真蹟千文如鐵線營結而成即此本也

陸東之書法似舅風氣過之傳世蘭亭詩五首今在樵李馮開之家筆法飄縱妍媚動人品在李北海顏平

欽定四庫全書

御定書畫譜
卷九十四

六

原之上故米南宮極稱許之或云此帖與王維江山雪霽圖李昇瀟湘煙雨卷皆太史公朝夕展玩者也陸東之時工臨寫今校理錢延年有東之書蘭亭用綠麻紙押尾署陸司議書

孫過庭書譜真蹟亦藏韓太史家嚴分宜故物也前有宋徽宗滂金御題政和宣和等印元初在焦達卿敏中所上下兩卷全金已缺其一上卷亦不能全文氏為摹刻停雲館帖中此帖宋時刻入石亦止存一卷

嘉興王廷槐藏張長史春草帖亦在嚴分宜家嘗入宣和祕府宋元人題名并跋甚多

張長史真墨宛陵詩李西臺蘇才翁皆有跋江陰卞華伯故物都玄敬書評云非真蹟也此卷今在韓氏謂出春草詩上兩家持論不同如此當細辨之

朱太保藏鄭虔閨情詩帖白麻紙真蹟

解氏藏李北海永康帖今在吳郡王氏真蹟神品上上

嚴氏書畫記曰懷素絹本草書十字文一卷初藏海鹽

欽定四庫全書

御定書畫譜
卷九十四

七

姚氏其家云此帖一字值千金故號千金帖不知幾傳失去予以善價得之通用黃絹八幅絲理精細纖毫無損交接處用軍司馬印箱記亦曾摹刻于停雲館後歸史氏自史氏歸嚴氏今已入內府矣蓋晚年書也

懷素酒狂帖舊在光福人家後歸李貞伯氏楊凝式鑒定寶寧賜玩記王詵寶寧賜第書廷堅觀倪瓚八月十一日觀于耕漁軒

項玄度藏懷素苦筍帖真蹟後有米數文跋尾其書較酒狂帖更勝

顏真卿大字瀛州帖為宋宣和御府故物元初藏張可與家後具王芝鮮于樞等六跋喬簣成題名弘治中歸之史明古嘉靖壬辰復在華中甫家而文徵仲為之跋至甲子歲為茂實府君所購後歸樵李項氏朱巨川誥並跋在孫氏

啓南公所藏予僅得南宋五公手札一卷後有李西涯

欽定四庫全書

御定書畫譜
卷九十四

八

吳匏菴諸公六跋即都玄敬寓意編中所載也王氏又藏沈傳師出塞詩一鮮于伯機故物亦見雲烟過眼錄中

柳誠懸小楷度人經真蹟後有華山道士魚又玄跋大觀宣和小璽趙嚴馮子振宋濂題識舊藏項司馬少溪家以授仲子希憲

項氏寶藏吳彩鸞正書唐韻全部鮮于承旨故物復為陸太宰全卿所購

五代楊凝式草書神仙起居法小米鑒定後有思陵釋文五行西秦張徵等印記商挺留夢炎跋語乃郡人王氏所藏也

似道留心書畫家藏名蹟多至千卷其宣和紹興秘府故物往往乞請得之今除烜赫名蹟載悅古蹟記者不錄第錄其稍隱僻者著于篇崔瑗臨史游急就章王廙仲春帖王導省示帖衛恒往來帖王徽之至節帖王珣三月帖張翼舅氏帖王濛餘杭帖張翰思鄉

欽定四庫全書

御定書畫譜
卷九十四

九

帖孔琳之日月帖謝靈運古詩帖王筠至節帖蕭思話奏事帖王僧虔陳情帖蔡景歷寂然帖陸繹稽古帖唐代宗守歲詩裴行儉十文李陽水篆書心經李白乘興帖徐嶠之天童經杜甫壯游詩白居易豐年帖杜牧之張好好詩張籍希深帖李商隱正書月賦杜光庭詩帖陸希聲贈誓光詩許渾烏絲闌詩楊虔五蘊論薛濤萱草詩韓偓芝蘭帖蘇靈芝達摩銘王仁裕送王禹偁詩錢鏐貢棗帖石曼卿大字古松詩

范成大詩蘇舜欽吳中詩草陸經武陵謠張九成小字黃庭經陳景元巖棲賦釋法暉細書經塔

祝希哲藏宋李建中千文一卷在其後人處末簡宋元人品題極多下迨文徵仲太史有跋尾真名蹟也近為玉峰好事家購去矣

宋宣獻公綬楷法為宋初第一極得黃庭經樂毅論遺法長洲黃氏藏其小楷十文一卷宋潛溪故物即天章閣所貯舊本也

欽定四庫全書

御定書畫譜
卷九十四

十

陸放翁自書詩一卷共計七首字畫遒勁可愛後有山陰杜思永跋今在吳郡王氏

朱文公自書武夷九曲詩卷在歙人黃某處

蔡君謨茶錄真蹟一卷王敬止故物後入嚴分宜家小楷精謹紙墨如新文徵仲太史極稱賞之

趙定宇祭酒藏蔡忠惠公中楷謝賜御書詩表字大如指頂結構謹嚴後有文同米芾等跋堪與韓存良太史家蘇文忠公元祐二年宜春帖子墨蹟作對其題

識多至十餘人悉宋元名手祭酒沒後流傳至長兄伯含處故得見之

先子累歲購求書法僅得東坡小楷乞居帖真蹟

王氏世藏坡翁小楷芙蓉城詩真蹟神品上上蓋得之嚴分宜所筆意姿媚可喜與吾家乞居帖絕不類或云徐氏小楷金剛經項氏小本表忠觀碑真蹟庶幾近之然未及見

又見東坡行書九辨帖筆意妙絕而無款識豈遭元祐

欽定四庫全書

御定書畫譜
卷九十四

十一

黨人之禍當時收藏者削去之邪

槁李項氏藏行九歌一卷止錄文選中所載六段

東坡草書寒食詩後黃山谷跋今在槁李項氏又行書

禱雨帖乃與錢齊明者今在金壇于氏

瑯琊王氏購藏薛道祖襖飲序一卷宋祕府故物即停

雲館帖所載也

秦少游小楷黃庭經在長洲黃氏質山公故物也後有

吳傳朋李泰發鮮于伯機康里子山四跋尾

秦太虛楷書古詩十九首一卷今藏震澤王氏

易安詞彙一紙乃清閨閣故物也卷尾畧無題識僅有

點定兩字耳

黃魯直諸上座帖草書師懷素頗逼真即嚴氏書畫記所載也舊藏李范菴家

黃魯直年譜載元祐丁卯歲行書大江東去詞全倣瘞

鶴銘法後附次韻子瞻題郭熙秋山圖詩小楷精緊

今在韓太史存良家本嚴分宜故物也

欽定四庫全書

御定書畫譜
卷九十四

十二

文徵仲藏黃魯直行書曹子建詩二首用澄心堂紙李

廷珪墨為之

嚴氏藏黃山谷草書嬾殘和尚歌筆法妙入神紙墨完

好真尤物也

朱性甫藏米老臨黃庭經一卷後歸石翁

伯啓晚年又藏米南宮晚年書宗室崇國公墓志銘鄭

居中撰文幾二十字極得多力豐筋緩總急送後有

袁桷鄧文原黃潛柳貫揭泐葉盛吳寬七跋是廣省

參政劉公欽謨故物也跋載朱性父鐵網珊瑚中

米老行書杜甫題王宰畫山水歌等帖並藏楊李項氏

米尚有自撰自書登黃鶴臺下臨金山賦在嚴分宜

家行筆奇偉足稱墨寶

海岳翁行書書帖今在城西王氏

馬主事抑之藏米臨顏魯公爭坐位帖全本上有賈似

道印元時入表文清公家表公前後凡再跋云

張謙藏米南宮帖十二冊各以類次如手東家書詩文

欽定四庫全書

御定書畫譜
卷九十四

十一

分四類上有閱古珍玩大印乃韓侂胄故物也

思陵行書子美題奉先少府新畫山水障歌黃蠟箋寫

真蹟前後用乾卦御書內府之印及紹興三璽

武林胡氏藏高宗御書損齋二字并御製損齋記右僕

射沈該以下聯名親書表在後並屬真蹟此卷前元

時在王子慶處亦見雲煙過眼錄

思陵草書一卷墨蹟藏玄海家每行止二字字大如拳

押縫有御書之寶印識尾有御書瓢印收藏有濟之

圖書及三槐堂印

思陵洛神賦卷絹本大行草後署德壽宮書李嚴詩題

後

思陵行書蘇武李陵詩共七首姿媚可喜與吾家杜陵

詩帖正同今在黃氏

項氏藏子昂秋興賦一卷左方有張東海跋尾

王氏舊藏宋人小楷史記真本一部原是松雪翁物

信國手書過小青口詩一卷後有原博濟之二跋乃徵

欽定四庫全書

御定書畫譜
卷九十四

十四

仲故物也今摹刻停雲館中

予家藏祝希哲懷知詩卷字小而結構雄偉購之謝氏

真奇蹟也

祝京兆楷行離騷經九歌行草孔雀東南飛二首並藏

吳中王氏是盛年妙筆

吾家世傳希哲京兆行書莊子逍遙遊師虞世南城南

陸氏藏王履吉草書枚乘七發做十七帖又一好事

家收文徵仲小楷古本水滸傳全部法歐陽詢未及

見之 清河書畫舫

明董其昌容臺集

予曾有右軍行穰帖真蹟十五字是十七帖一種及武林楊侍御自安福傳來唐摹絕交書紙墨用筆與行穰帖同彥京為予勒石因識之

謝惠連墨蹟新都汪氏所藏予令人摹刻入戲鴻堂帖中

破邪論是唐人小楷與柳誠懸清淨經並是真筆一見

欽定四庫全書

御定書畫譜
卷九十四

十五

之義興吳光祿家摹刻戲鴻堂帖中

壬辰九月過嘉禾所見有褚摹蘭亭徐季海少陵詩顏魯公祭濠州伯父文豪趙文敏道德經小楷皆真墨也

予昔于宋光祿家見永師千文後有永師押薛紹彭收藏印

曹娥碑真蹟卷有高宗跋是北宋物元文宗命柯九思鑒定御府書畫因賜之以旌其勞在婁江王文肅公

家

靈飛六甲經鍾紹京書有宋徽宗標題後有倪雲林虞伯生跋海寧陳太常次公所藏

黃庭外景經真蹟與內景經同一絹素同一筆法又有云是宋高宗臨者在吳江吳憲副家

顧愷之女史箴不全本在嘉禾項氏

行書蘭亭序褚河南臨澄心堂紙米元章跋在海寧陳

家闕三行

欽定四庫全書

御定書畫譜
卷九十四

十六

又蘭亭褚臨墨蹟絹本王弇州家藏復歸新都汪太學

有米元章小行楷跋今在廣陵

蘭亭唐標第七本絹素奕奕無題跋亦似褚筆今在新都王氏書畫舫

大令東山松帖真蹟送黎帖真蹟皆曾見之今不知歸何人

顏魯公送劉太冲序綠箋書北京國學刻石真蹟奇宕為遼東李帥所藏

顏魯公祭季明文真蹟鮮于伯機所藏跋云吾家無第一天下無第二在新都吳太學家停雲館所刻乃米臨予刻之戲鴻堂帖者是也

丁丑三月過京口訪張太學修羽出所藏楊少師真蹟賞玩彌日

項晦伯家有趙文敏書汲黯傳小楷特為道媚與本家筆不類

東坡先生書養生論真蹟一卷是靖江朱光祿所藏後

欽定四庫全書

御定書畫譜
卷九十四

十七

為河南俞中含購去今吳中多雙鉤偽迹乃從我家戲鴻堂帖摹出

予在長安得趙伯駒畫老姥授陰符圖及游白岳見趙子昂書陰符小楷并置篋中

清淨經蘇門高子業家藏今歸義興吳光祿刻之戲鴻堂帖中

黃庭經以師古齋刻為第一乃遂良所臨也淳熙續帖亦有之

黃庭經以師古齋刻為第一乃遂良所臨也淳熙續帖亦有之

黃庭經是褚本予曾于沈純甫司馬齋頭見之今歸問卿收藏

趙文敏跋定武蘭亭及獨狐東屏二本皆真蹟或十三跋或十七跋予皆見之

謝萬鯁恨帖真蹟在新安溪南吳氏

王獻之述書狀有褚遂良摹本予見之

欽定四庫全書

御定書畫譜
卷九十四

十八

歐陽率更令所書千文楊補之家藏本

信本有小楷九歌予得宋搨世無二本為朱御醫以古硯易去

義陽吳光祿丞澈如寄褚登善千字文示予披覽數日歐陽信本有楚辭諸帖刻于長沙

東林岳麓寺碑皆宋以後重刻大照禪師碑乃唐時硬

黃雙鉤予最嗜李書晚獲觀此遂摹勒上石以公同好雖謂之唐搨可也

昔顏平原鹿脯帖宋時在李觀察士衡家今為辰玉所藏

爭坐位帖在永興安師文家安氏析居分而為二人多見其前段師文後乃并得之相繼入內府今前段為項德新所藏

杜牧之書張好好詩深得六朝人風韻予所見顏柳以後若溫飛卿與牧之亦名家也

陳仲醇既摹子瞻南華妙高二帖他日復得煎茶聽琴

欽定四庫全書

御定書畫譜
卷九十四

十九

詩各一篇予亦得三馬圖贊皆奇絕

徐浩道德經上卷在無錫華學士家乍見似紙素諦觀

知為絹本

張長史宛陵帖有李建中蘇舜欽易簡三公題跋韓宗

伯所藏以為甲觀

楊凝式書師韭花帖宣和書譜所載正書今在嘉禾項

氏

米元章行書離騷宜興吳民部所藏近始裝潢成帙真

海內奇觀

唐碑懷仁三藏聖教序行楷新都吳周生不惜十五城購之非賞鑒家求一見不可得也周生發願刻石令晦迹十年始復出見

吾家有黃庭經樂毅論東方贊曹娥碑四種宋揭加以十三行洛神賦及米元章弭盜疏共六帖冠絕海內

容臺集

明董其昌畫禪室隨筆

欽定四庫全書

御定書畫譜
卷九十四

二十

右軍官奴帖己卯秋予試留都見真蹟蓋唐冷金箋摹者此帖後歸婁江王元美予于己廿詢之王澹生則已贈新都許少保矣

大令洛神賦真蹟元時猶在趙子昂家今雖宋搨不復見矣今日見此四行亦唐摹冷金舊蹟在樵李項氏予在梁溪見徐李海道德經

襄陽書天馬賦予所見已四本一為擘窠大字後題云為平海大師書後園水邨公觀在嘉禾黃履常參政

家一為檢討王履泰藏乃仿顏平原爭坐位一在吾鄉家參政家一在新都吳氏後有黃子久諸元人跋懷素自叙帖真蹟嘉興項氏以六百金購之朱錦衣家朱得之內府蓋嚴分宜物沒入大內後給侯伯為月俸朱太尉希孝旋收之其初吳郡陸完所藏也文待詔曾摹刻停雲館行于世予二十年前在構李獲見真本年來亦屢得懷素他草書鑒賞之唯此為最予見懷素一帖云室中有神人藏書蔡中郎得之

欽定四庫全書

御定書畫譜
卷九十四

十一

藏真書予所見有枯筍帖食魚帖天姥吟冬熱帖皆真蹟以澹古為宗

趙文敏臨禊帖無慮數百本予所見亦至夥

米元章書多從褚登善悟入登善深于蘭亭為唐賢秀穎第一此本蓋其衣鉢也

予三見子瞻自書赤壁賦一在構李黃承玄家一在江西楊寅秋家一在楚中何宇度家黃卷有子瞻跋尤勝然皆前賦也後赤壁則惟趙子昂有石本又思陵

嘗書之夏禹玉為補圖亦在楊寅秋家

客有持趙文敏書雪賦見示者予愛其筆法道麗有黃庭樂毅風規未知後人誰為競爽秦太虛撰龍井記直稱蘇家勝友元章此碑絕得李括州三昧惜多殘缺予為備之

韓宗伯家藏子敬洛神十三行真蹟

爭坐位帖子以陝本漫漶乃摹此宋榻精好者刻之戲鴻堂中

欽定四庫全書

御定書畫譜
卷九十四

十二

褚遂良西昇經與淳熙秘閣續帖所刻黃庭經同一筆法真蹟昔藏新都殷尚書家予在長安曾于殷參軍家見之後歸武林洪黃門黃門遂以贈予

韓宗伯藏曹娥碑真蹟絹本乃宋德壽殿題元文宗命柯九思鑒定書畫賜以此卷趙孟頫跋記其事甚詳婁水王奉常家藏趙吳興詩帖至佳予從高仲舉見之新都汪太學孺仲以宋榻爭坐位帖見示神采奕奕字形較陝刻差肥時有訛字乃是米海岳所臨米嘗自

記有臨爭坐位帖在浙中此殆其真跡入石者耶

唐鍾紹京書通甲神經有宣和政和小璽宋徽宗標識

倪元鎮家藏有元鎮跋語

予遊京師得鑒李伯時西園雅會圖有米南宮蠅頭題

跋已廿四月又從唐定初獲借海岳千文臨成別本

十七帖硬黃本宋時魏泰家藏淳熙秘閣續帖亦有刻

予在都下友人汝陽王思延得硬黃本已于濟南邢

子愿見所刻石本即王本也

欽定四庫全書

御定書畫譜
卷九十四

五

樂毅論梁世所摹與唐摹字形各異淳熙秘閣梁模本

也予家戲鴻堂帖唐摹本也又有一本唐摹在長安

李氏曾屬余跋亦有文壽承跋蓋貞觀中太宗命褚

遂良等摹六本賜魏徵諸臣此六本自唐至今予猶

及見其二恨梁摹白麻紙真蹟為新都吳生所有

趙文敏得宋思陵十三行于陳灝蓋賈似道所購先九

行後四行以悅生印款之此子敬真蹟至我朝惟存

唐摹耳晉陵唐太常家藏宋榻為當今第一曾一見

于長安臨寫刻石恨趙吳興有此墨蹟未盡其趣

褚河南臨襖帖白麻蹟一卷曾入元文宗御府有天厯

之寶及宣政紹興諸小璽宋景濂小楷題跋吾鄉張

東海先生觀于楊氏之行澤樓蓋雲間世家所藏予

得之吳太學每以勝日展玩輒為心開

官奴帖真蹟在淳熙秘閣續刻昔年見之南都已聞為

海上潘方伯所得又復歸王元美王以貽予座師新

安許文穆公文穆傳之少子曾君一武弁借觀因轉

欽定四庫全書

御定書畫譜
卷九十四

五

售之今為吳太學用卿所藏

宋揭絳州帖乃官奴嫡家故佳本在汝帖長沙之上此

本已具各體即不完善比之威鳳一毛可藏也

雲麾將軍碑文多不全獨此刻前後讀之皆有論次當

是石未泐時拓本殊可寶藏

予得穎上襖帖較各帖所刻皆在其下當是米南宮所

摹入石者其筆法頗似耳

吳用卿得黃庭經予定為唐人臨右軍

王珣書滿漉古淡用卿得此可作寶晉齋矣

王元美家有虞永興汝南公主墓志

宋元章評紙帖與吾友王宇泰所藏天馬賦同是一種

書

朱敬輅所藏趙榮祿鮮于伯機真蹟借歸摹之戲鴻堂

帖中

坡公書赤壁賦真蹟在王履善家每波畫盡處隱隱有

聚墨痕非石刻所能傳耳

欽定四庫全書

御定書畫譜
卷九十四

五

懷仁聖教序真蹟視陝本特為姿媚吾家有宋舍利塔

碑云習王右軍書集之為習正合

顏魯公送劉太冲真蹟在長安趙中舍士禎家以予借

摹遂為好事者購去予凡一再見不復見矣淳熙祕

閣續帖亦有刻

楊義和黃庭經元時在鮮于樞家予昔從韓宗伯借摹

數行茲勒以冠諸帖

清淨經似永興破邪論海上潘氏所藏宋帖也

索靖出師頌在樵李項子京家故是甲觀

張長史真書壁記世無別本唯王奉常敬美有之陳仲

醇摹以寄予

定武楔帖唯賈秋壑所藏至百餘種令其客廖瑩中縮

為小本或云唐時褚河南已有之

丁酉三月十五日予在吳門韓宗伯家其子古周攜示

予顏魯公自書告身徐季海書朱巨川告即海岳書

所載皆是雙壁 畫禪室隨筆

欽定四庫全書

御定書畫譜
卷九十四

五

明陳繼儒祕笈

米南宮樂圃墓志手蹟予從辰玉家見之

顧光祿有唐朝人兄妹共寫法華經七卷楷法甚精

予見蘇文忠手蹟與郭廷平帖又與中玉提刑帖又獻

壕帖又蘇過題郭熙平遠帖舊為朱子儋所藏文太

史跋

予藏有東坡清醇帖手蹟

予于項玄度家見薛道祖字一幅又王晉卿謝餽帖一

幅又韓絳字一幅又吳傳朋節婦詩一幅又沈文通秋杪帖一幅又蘇文定公和詩帖一幅歐陽玄字一幅又宋榻懷素千文一冊又東坡乞田帖一卷又穎濱帖二卷又黃文節公詩帖一卷又米襄陽杜詩山水歌一卷又子昂文賦一卷吳興賦一卷而其間如蘇明允題懷素詩鄒志完建平東張南軒薦游誠之書皆生平未見之翰墨也諸蹟中宜以東坡手東六紙為輔而以懷素苦筍帖後有米數文跋者冠之矣

欽定四庫全書

御定書畫譜
卷九十四

五

紫陽山下有米南宮大書第一山三字于壁石予從友人張元弢得其榻

俞紫芝有臨十七帖向藏林叔大家後有大勅字世傳為勅本紫芝過其家臨之

顏書朱巨川誥真蹟有二卷皆絹本前後紹興小璽藏項子京家其停雲館刻墨蹟後有鄧文原喬贊成二跋者向為陸太宰全卿所寶跋十餘言今藏予家予故有寶顏堂印

子昂亭林碑記真蹟魯黏村民屋壁上王野賓買之以轉售項氏

忌陵草書詩墨蹟藏項家押縫有御書之寶印書後有御書瓢印收藏有王濟之圖書及三槐堂印

褚河南聖教序有三本其字有肥瘦方圓寬緊不同予有瘦本元美公題籤

乙未六月初四日過項又新觀魯公顏真卿行書定襄王郭公帖趙子昂書張文階送秦少宰叙王羲之草

欽定四庫全書

御定書畫譜
卷九十四

五

書二帖黃太史墨妙趙子昂歸去來辭

予得俞仲尉手寫金剛經一卷蠅頭細書真光明寶藏也

大令送梨帖十字柳誠懸十二字向藏王敬美家分授第四子閑仲予見之大令字疑鈞填公權書真神品也

子昂書秋興賦行書墨蹟向為吾鄉王緝之所藏後有張東海跋今藏希憲家